



# BOSANSKOPETROVAČKI VJESNIK

Mjesečnik Općine Bosanski Petrovac

Glas Načelnika . . . . .	1	Dogradnja kanalizacionog priključka na Ploči . . . . .	5
USK krši prava lokalnih zajednica! . . . . .	1	Elektrifikacija povratničkih naselja . . . . .	5
Svjetska farma goveda na Bjelajskom polju . . . . .	2	Pomoć poljoprivrednicima . . . . .	6
Bingo kupio „Novitet“ . . . . .	3	Upis nekretnina . . . . .	6
Useljena zgrada za socijalno stanovanje . . . . .	3	Održana Svetosavska akademija . . . . .	6
Zapušten grob velikog Jovana Bijelića! . . . . .	4	Promocija knjige poezije „Toplina“ . . . . .	7
Petrovački „Bosanski ćilim“ na markama BH Pošte . . . . .	4	Petrovački sportist 2015: šesnaestogodišnji Mirnes Hukić! . . . . .	7
Grad „okupiran“ bagerima . . . . .	4	Sportist USK 2015: boksač Elvedin Dulić! . . . . .	8
Povezana kanalizaciona mreža ispod magistrale . . . . .	5	Nemaju sud, notara, advokata, zakidaju ih za šumu, ali (Avaz-ov članak) . . . . .	8



## Glas Načelnika

### UISTINU VJESNIK PETROVAČKIH GRAĐANA!



Dragi sugrađani,

Zadovoljstvo mi je da Vam predstavim informativni vjesnik Općine Bosanski Petrovac, putem kojeg će Vam svi državni organi redovito polagati račune o svom radu, od mene kao Načelnika, preko Općinskog vijeća i općinskih službi, do mjesnih zajednica! Istovremeno, bit će to i mjesečnik, u kojem ćete moći objavljivati Vaše stavove, prijedloge, kritike, zavičajne priče, sadašnje i nekadašnje petrovačke fotografije...

Vidljivo je na svakom koraku da smo uložili velike napore i ostvarili željene rezultate – bolje se vidi, da tako simbolično kažemo – od nove rasvjete u gradu do prvih električnih sijalica u Prkosima, i do ponovnog uvođenja struje u povratnička naselja Grmeča, u Marjanovića i Vučkovića Dolu.

A za koju sedmicu, ili mjesec, potom godinama, trajno, biće dobro vidljivo kako Petrovčani domaćinski upravljaju svojim bogatim šumskim blagom! Do sada su naše šume bile, praktično, izvan našeg domašaja, pod nedomaćinskom upravom ŠPD „Unsko-sanske šume“ i nemilosrdnom eksploatacijom nezajažljivih pojedinaca. Po (do)sadašnjim „pravilima“, naše šume čine polovinu ukupne realizacije „Unsko-sanskih šuma“, a od toga nam se vraća mizernih jedan odsto! Uložili smo mnogo napora i vremena, dok nismo uspjeli riješiti ovaj ogromni problem! Ustavni sud Federacije BiH objavio je 26. januara za nas istorijsku presudu: Skupštini USK se nalaže da u roku od šest mjeseci uskladi sporne odredbe Zakona o šumama sa Ustavom FBiH i sa federalnim Zakonom o pravu lokalnih zajednica!

Privode se kraju radovi na projektu kanalizacije, koji je ocijenjen kao jedan od najuspješnijih projekata te vrste u BiH; očekuju se velike investicije i mnoga radna mjesta koja će u dogledno vrijeme otvoriti preduzeća „Alma Ras“, „Bingo“, „Pirnar“ i „Arifagić Investment“ i još mnogo dobrih vijesti...

O svemu što planiramo i radimo potrebno je redovito informisati naše sugrađane, a isto tako je potrebna povratna informacija, da blagovremeno prepoznamo vaše potrebe, kako bismo zajednički uspjeli da naš grad učinimo boljim mjestom za život

Općinski načelnik Zlatko Hujčić

## Ustavni sud FBiH podržao zahtjev načelnika Hujčića!

### USK KRŠI PRAVA LOKALNIH ZAJEDNICA!

Ustavni sud Federacije BiH objavio je u Sarajevu, 19. januara, toliko očekivanu, i još više važnu presudu, za našu Općinu:

„Odlučujući o zahtjevu načelnika općine Bosanski Petrovac, za zaštitu prava na lokalnu samoupravu, u vezi sa Zakonom o šumama („Službeni glasnik Unsko-sanskog kantona“, broj 22/12), Ustavni sud je utvrdio da je ovim zakonom povrijeđeno pravo Općine Bosanski Petrovac na lokalnu samoupravu, te je data mogućnost Skupštini USK-a da u roku od šest mjeseci od dana objavljivanja ove presude u Službenim novinama FBiH i Službenom glasniku USK-a uskladi osporeni zakon sa Zakonom o principima lokalne samouprave u FBiH.“!



Teško je shvatiti, „bez razumne sumnje“, kako kažu pravnici, na osnovu kojeg su prava, pogotovo logike, članovi Skupštine USK, jula 2012. donijeli, zakon temeljem kojeg su kantonalnom ŠPD „Unsko-Sanske šume“ dali pravo da naše, petrovačke šume, nemilice iskorištavaju koliko im se hoće, ostvarujući na našim šumama 50% „balvanskog“ prihoda, a da, zauzvrat, našoj Općini „dodijele“ „pravo“ na 1% njihovog prihoda!

Narod zna: „Nije ničija do zore gorila!“, ili „Možeš kako hoćeš, ali ne možeš dokle hoćeš!“

Pa, koji to bijahu „narodni poslanici“ koji su umislili da mogu petrovačke šume zlorabiti dokle im se hoće?

Sadašnji članovi Skupštine USK imaju jedinstvenu priliku da čim prije provedu presudu Ustavnog suda, i da time koliko-toliko povrate povjerenje građana u zakonodavnu vlast. Imaju priliku da odgovorno – dakle pošteno, moralno, ljudski, pred narodom, pred biračima koji su im povjerali povjerenje! – razmotre i ustanove ko to, i zašto, tako kratkovitno, tako samovoljno, tako neodgovorno, zloupotrijebi častnu ulogu narodnog poslanika! Nije čudno što pred časnim sudom već odgovaraju neki od najodgovornijih ljudi za ovakve zloupotrebe!

Ovim je Ustavni sud potvrdio, da je Bosanski Petrovac godinama bio diskriminisan u pogledu zaštite i brige o najvećem vlastitom prirodnom bogatstvu – o vlastitim šumama! Kantonalni „narodni poslanici“, među kojima nema nijednog sa područja naše Općine (!?), naprosto su, i naprasno, „zakonski“ razvlastili prave vlasnike šuma, kako u pogledu zastupljenosti u upravljačkim strukturama kantonalnih šumskih preduzeća i institucija (i zapošljavanja u njima), tako i u pogledu raspodjele prihoda ostvarenog sječom šume naših šuma!

Izmjenom spornih odredbi zakona, Skupština USK će ispraviti grešku koju je činila, i do doglednog vremena čini štetu i sa drugim općinama USK bogatim šumom.

## Borba za pravdu, od 2012!

Zahtjev za ocjenu ustavnosti spornih odredbi Zakona o šumama USK načelnik Huijić je uputio Ustavnom sudu FBiH prije pune četiri godine (4. marta 2012.)! U međuvremenu je poslao čak četiri urgencije! ...Šta bi bilo da Načelnik nije bio ovoliko istrajan? Kako god, komentarišući odluku, načelnik Huijić se zahvalio Ustavnom sudu FBiH na dosljednoj primjeni Ustava FBiH i Evropske povelje o pravima lokalnih zajednica:

„Ovo je naša velika pravna i moralna pobjeda, za koju smo se dugo borili! Ona je rezultat naše svakodnevne pravedne borbe za bolji život naših građana i za njihova prava, a protiv nepravde, samovolje i kriminala koji sistematski uništavaju našu općinu“ – kaže Huijić. Načelnik je također istakao, da mu je žao što je u ključnom momentu te borbe bio lično iznevjeren – izostankom podrške članova Općinskog vijeća njegovoj inicijativi o zabrani sječe šume na području Općine. „Očekivao sam odluku Ustavnog suda i puno ranije, ali je očigledno da je ona donesena tek nakon naših brojnih urgencija i nakon naše javno iskazane spremnosti da se u ovoj borbi ide do kraja, svim sredstvima. Žao mi je što neki članovi Općinskog vijeća nisu prepoznali moju pravu i za građane pravednu namjeru, i što su pokleknuli pred privatnim interesima pojedinaca i lobija, pred samim ciljem ove maratonske utrke. Međutim, sretan sam što je ona istrčana do kraja, i što je, izgleda, i sama odlučnost koju smo pokazali u decembru bila dovoljna da stvar pokrene sa mrtve tačke i da Sud donese odluku već mjesec nakon toga! Ne mislim da je ovo bilo slučajno“ – sa zadovoljstvom zaključuje neumorni načelnik Huijić.

## SVJETSKA FARMA GOVEDA NA BJELAJSKOM POLJU

*Firma „Arifagić Investment“ posjeduje, u Kozarcu, najveću farmu „norveških crvenih krava“ na svijetu, a već u martu se dio farme prebacuje na Bjelajsko polje.*

**Na Bjelajskom polju, podno Oraškog brda, za koju sedmicu će se nastaniti oko 300 tzv. „norveških krava“, u vlasništvu Jusufa Arifagića, svjetski poznatog i priznatog farmera! Njegova firma „Arifagić Investment“ posjeduje najveću na svijetu farmu „norveških crvenih krava“ koju je, novembra 2014. u Kozarcu svečano otvorila g-đa Vigele Lilloe, ambasadorica Norveške u BiH.**

Budući da je g. Arifagić, kao prognanik, proveo rat u Norveškoj, ambasadorica je s razlogom naglasila: „Jusuf je potpuno u pravu – on se ne osvrće unazad, nego gleda naprijed, u budućnost! On nastoji da svojim doprinosom učini da se u ovoj zemlji bolje živi!“ Bolje će već ove godine početi živjeti oko 50 naših sugrađana, koji će dobiti radno mjesto na farmi!

Ali, ne samo bolje, nego u pravom luksuzu uživaće Arifagićevo stado, kao u kakvom „kravljem hotelu sa nekoliko zvjezdica“! Ovog puta radi se o 300 junica, koje će se uzgajati u idealnim higijenskim i zdravstvenim uslovima. Takva će im biti i hrana, „medenopoljska“, da je s razlogom tako nazovemo. Hrana je i glavni razlog preseljenja određenog broja grla iz Kozarca, jer tamo nije dobio dovoljne i obećane količine zemljišta na kojem bi mogao proizvesti hranu za svoje krave. „Uz sva obećanja, nismo našli rješenje, i ja sam počeo tragati u kojem dijelu ove zemlje mi možemo naći dovoljno zemlje, kako bismo riješili problem hrane. Izbor je pao na Bosanski Petrovac, gdje postoje enormne količine neobrađenog zemljišta i dobrih pašnjaka. Od petrovačkih vlasti dobili smo odmah potvrđan odgovor, bez gubljenja vremena! U roku od nekih sedam dana smo obezbijedili 85 hektara zemljišta, što je za sada dovoljno“, izjavio je Arifagić početkom februara, na televiziji NTV 101 iz Sanskog Mosta.

Sredinom prošle godine u našoj je općini odjeknula vijest, kako je čuvena firma „Arifagić Investment“ zainteresirana za otvaranje farme goveda na petrovačkoj ravni bogatoj zdravim pašnjacima. Već u septembru zaključen je ugovor o zakupu 83 hektara napuštenog državnog poljoprivrednog zemljišta, na prostoru Prkosa i Oraškog brda, gdje se nalazi ugašena zemljišna zadruga.

Arifagić ističe kako on i njegova kompanija ne dozvoljavaju uplitanje politike u njihov rad i kako sve što rade nastoje raditi u skladu sa moralnim i etičkim principima savremenih evropskih kompanija. „Bitno je da smo uspjeli napraviti jedan transfer znanja i dostignuća unutar poljoprivrede. Sve smo to uradili sa našim timom uz konstantan rad i edukaciju“ naglasio je Arifagić važnost nauke i profesionalizma u svom poslu.

## Planovi u Bosanskom Petrovcu

Govoreći o planovima za ulaganja u bosanskopetrovačku općinu, Arifagić je rekao kako je u pripremi potpisivanje ugovora za najam još oko 1.800 dunuma pašnjaka i kako u saradnji sa Vladom Unsko-sanskog kantona i općinskom administracijom očekuje da će do 15. marta biti riješena kupovina određenih objekata koji će takođe služiti za smještaj podmlatka. „Najjednostavnije rečeno, mi ćemo sav podmladak ili uzgoj kvalitetnih junica i tov junadi izmjestiti na područje Bosanskog Petrovca, a na farmi u Kozarcu će ostati samo muzne krave“ kazao je Arifagić na sanskoj televiziji. Naglasio je i da će se izmještanjem kapaciteta u Bosanski Petrovac

ostvariti i određene uštede, budući da „Arifagić Investment“ svakodnevno transportuje sijeno i žitarice za potrebe svoje farme sa prostora naše općine u Kozarcu.

Po Arifagiću, ovo podrazumijeva da će se u Potkozarju morati zatvoriti nekoliko radnih mjesta, ali da su njegovi raniji planovi da u Bosanskom Petrovcu otvori oko 50 radnih mjesta u 2016. godini. „Naši planovi za 2016. godinu su, otprilike, da ćemo negdje u martu mjesecu nekih 300 grla izmjestiti u Bosanski Petrovac. Trenutno imamo oko 700 grla i velike probleme sa prostorom“, naglasio je Arifagić i dodao da će se ovim stvoriti pretpostavke da njegova kompanija do kraja godine dosegne stado od 1.000 grla i okrene se investicijama u preradi mlijeka i mesa.

## Značaj nauke i pozitivnog okruženja

U svim svojim nastupima Arifagić ističe značaj primjene nauke i zapadnih tehnologija u agraru. U trajnom je kontaktu sa prijateljima, ekspertima iz Norveške, koji svaka dva mjeseca posjećuju njegovu farmu. Značajna sredstva se ulažu u stalno obrazovanje i usavršavanje uposlenika, što je jedini način da njegova farma i kompanija može uspješno poslovati u oštroj tržišnoj konkurenciji kakva vlada na jedinstvenom tržištu EU.

Arifagić upozorava da su bh. poljoprivredni proizvođači osuđeni na propast, ako ne budu saradivali, udruživali se i podizali nivo kvalitete svoga rada: „Mora postojati određeno koordinaciono tijelo koje će uvezivati sve poljoprivredne proizvođače. Morat će doći do sprege poljoprivrednih proizvođača i naučnih institucija, veterinarskih fakulteta, poljoprivredno-prehrambenih instituta. Šta moju farmu čini „posebno“? Ništa posebno: ja samo nastojim da ona dostignuća koja su norveški ljudi stvorili u zadnjih 75 godina primijenim ovdje, i mislim da sam u tome i uspio.“

Arifagić ističe kako je investiranjem u nauku, i dobrim radom, njegova farma uspjela proizvoditi mlijeko visokog kvaliteta, sa 4,5% mliječne masti i 3,9% proteina, tako da je prije dva mjeseca postala najveći proizvođač mlijeka u RS. „Arifagić Investment“ ima svoj evropski izvozni broj, proizvodi 6.000 litara mlijeka dnevno, a plan je dostići ukupnu proizvodnju od dva i po miliona litara mlijeka u 2016. godini!

Uz sve ovo, Arifagić naglašava važnost saradnje i pozitivnog okruženja u kojem se radi, te ističe kako narodi u BiH imaju budućnost samo uz suživot i zajednički rad za opšte dobro. „Politike dolaze i prolaze... Mi smo ti koji kreiramo našu budućnost! Iz svega ovoga treba izvući pouke i shvatiti ono što ja uvijek kažem – ujutru kad ustaneš prvo se okreni prema svom komšiji pa onda pogledaj na Sunce!“, naglasio je Arifagić u intervjuu NTV 101.



# Bingo kupio „Novitet“

Senad Džambić, vlasnik preduzeća Bingo doo iz Tuzle, potpisao je 30. oktobra 2015. ugovor sa Hetom (Heta Asset Resolution BiH) o kupovini nekadašnje uspješne petrovačke fabrike „Novitet“. Potpisivanju u Tuzli prisustvovali su Izudin Saračević, premijer Unsko-sanskog kantona i Zlatko Hujčić, načelnik Općine.

„Ovo je bio jedan dugotrajan i mukotrpan period neizvjesnosti! Danas je ona uspješno okončana, sudbina imovine „Noviteta“ dobila je svog konačnog i uspješnog vlasnika. S razlogom se kaže 'Bingo je preduzeće u koje se vjeruje!' – rekao je načelnik Hujčić.

Fabrika „Novitet“ je prošla kroz fazu loše privatizacije. Tadašnji vlasnici su podizali kredite, a imovinu „Noviteta“ stavljali pod hipoteku. Kako kredite nisu vraćali, imovinu je preuzela Heta, koja je današnjim ugovorom imovinu prodala najvećem domaćem trgovinskom lancu.

Stečajni postupak u Novitetu trajao je 10-ak godina. Općinski sud u Bihaću zaključio je postupak 2013. godine, jer preduzeće više nije imalo stečajne mase.

„Ovim povodom želim podsjetiti da se u našem gradu dešavaju izuzetno značajne stvari: izvođenje se veliki infrastrukturni projekti, otvorili smo



kanalizacione mrežu, uradili smo neke značajne vodovode, krenula je pozitivna priča o poljoprivredi i stočarstvu zahvaljujući firmi Arifagić Investment doo, čiji je vlasnik Jusuf Arifagić... Sada, dolaskom preduzeća Bingo, događa se nešto što će se pamtit, jer Bingo nije samo trgovina, nego sve više i proizvodnja“ – rekao je načelnik Hujčić.

Premijer Izudin Saračević i načelnik Hujčić, zajedno sa Senadom Džambićem, vlasnikom Binga, u Tuzli

su obišli dio proizvodnih pogona Binga, gdje su se upoznali sa paletom proizvoda koje Bingo proizvodi pod svojim brendom.

Posljednja informacija, koja se tiče ovoga kapitalnog projekta, za Petrovčane, je početak zemljanih i ostalih građevinskih radova, na ovoj lokaciji, koji kreću početkom marta.

Plan je, inače, da se pogon Alma Ras i supermarket, otvore, do ljeta ove godine.

## USELJENA ZGRADA ZA SOCIJALNO STANOVANJE

Nakon dvadeset godina neizvjesnosti, šest porodica raseljenih lica uselilo je 27. novembra 2015. u novoizgrađenu zgradu! Zvanično useljenje omogućeno je, i obavljeno, nakon što su Zapisnik o primopredaji zgrade potpisali načelnik Zlatko Hujčić i Azema Avdušinić, projekt menadžer nevladine organizacije Hilfswerk iz Austrije. Time je ozvaničen završetak projekta „Zgrada za socijalno-neprofitno stanovanje“, namijenjene za raseljena lica.

Ovom prilikom održan je sastanak sa stanarima. Razgovarano je o uslovima i načinima korištenja stanova, o sigurnoj i racionalnoj upotrebi električne energije, o korišćenju zajedničkih prostorija, o raznim pitanjima kućnog reda... U razgovoru su učestvovali načelnik Hujčić, šefica Službe za stambene polove Nataša Kecman i predstavnici Hilfswera. Gospođa Avdušinić naglasila je da će Bosanski Petrovac biti i iduće godine obuhvaćen projektima koje će provoditi UNHCR i Hilfswerk, u okviru „Podrške trajnim rješenjima Revidirane strategije za provedbu Aneksa VII Dejtonskog mirovnog sporazuma“. Radi se o izgradnji stambenih i infrastrukturnih objekata, namijenjenih održivom povratku.

Svečanost dodjele ključeva stanova održana je nešto ranije, 19. novembra; tim činom počeo je sigurniji i udobniji život za šest porodica koje su prije dvije decenije protjerane iz RS. Simboličnim presjecanjem vrpce, zgradu su „otvorili“ Endriju Mejn (Andrew Mayne), predstavnik UNHCR-a za jugoistočnu Evropu, Miko Vejrinen (Mikko Vayrynen), vršilac dužnosti šefa Regionalnog ureda Delegacije Evropske unije u Banjaluci i Suzana Jašarević, direktorica Hilfswera za BiH.

„Postoje plemeniti ljudi, koji su spremni uložiti vrijeme i novac za ljude koji su ugroženi. Ova zgrada sa šest stanova završena je za rekordnih devet mjeseci, a vjerujem da će slični projekti biti nastavljeni jer, nažalost, postoji još ljudi koji su stambeno ugroženi i kojima treba pomoć“ – rekao je načelnik Hujčić.

„Zajedno radimo da bismo proveli Aneks VII Dejtonskog sporazuma. Projekt je uspješno završen zahvaljujući podršci nevladine organizacije Hilfswerk iz Austrije, a finansirali su ga UNHCR i Evropska komisija“ – istakao je Endriju Mejn.

Izgradnja zgrade za socijalno stanovanje za raseljena lica dio je projekta „Podrška trajnim rješenjima Revidirane strategije za provedbu Aneksa VII Dejtonskog mirovnog sporazuma“, čija je ukupna vrijednost 8,1 miliona eura. Evropska unija ga finansira sa oko 7 miliona eura, kroz IPA-program, a sufinansira i provodi UNHCR, u suradnji sa projektnim partnerima.

„Ova zgrada za šest porodica, kojima su upravo uručeni ključevi, jeste konkretni rezultat podrške Evropske unije osiguranju trajnih rješenja za raseljena lica“ – rekao je Miko Vejrinen, naglasivši zadovoljstvo s onim što je danas vidio u našem gradu. Na

svečanosti dodjele stanova, sretnim korisnicima su se obratili Šefket Hafizović, savjetnik ministricе za ljudska prava i izbjeglice BiH, Nisvet Mujanović, savjetnik ministra raseljenih osoba i izbjeglica FBiH, kao i Izudin Saračević, premijer Vlade USK. Premijer je i ovom prilikom naglasio svoj stav da su „jedinice lokalne samouprave najbolji dio Kantona!“ Dodao je: „Ovo je izraz i potvrda velikog zalaganja vašeg načelnika, da se pronadu kvalitetna rješenja za ove kategorije. Veliko zadovoljstvo je vidjeti osmijeh na licima korisnika ovih stanova!“

Izgradnja danas otvorene zgrade za socijalno-neprofitno stanovanje koštala je više od 160 hiljada eura, koja su osigurana donatorskim sredstvima. Općina je osigurala zemljište, sa komunalnom infrastrukturom i svim potrebnih građevinskih saglasnostima, u visini od 50 hiljada KM.



# Zapušten grob velikog Jovana Bijelića!

Tokom službenog boravka u Beogradu, 12. januara, kojom prilikom je imao sastanak i sa Petrovčanima, brižni zemljaci ukazali su načelniku Zlatku Hujiću da je zapušten grob slikara Jovana Bijelića, koji se nalazi na Novom groblju u Beogradu!

„Bio sam zaprepašten onim što sam vidio u dijelu groblja koje se naziva Aleja velikana! Grob petrovačkog velikana, koji je umro prije više od pola stoljeća (1964.) – označen je drvenom daskom, koja jedva stoji!!? Ono što mogu reći bez ikakve dvojbe:

rodni grad će ubrzo našem velikanu podići mermerni nadgrobni spomenik, onakav kakav imaju velikani oko njega, kao što su poznati knježevnici (Skender Kulenović, Ivo Andrić, Meša Selimović...), glumci (Severin Bijelić-njegov jedini sin, Mija Aleksić, Stevo Žigon...), političari (Zoran Đinđić) i mnogi drugi – rekao je Hujić.

Ovom prilikom je, konačno, dogovoreno da se otkrivanje spomen ploče, ovom velikanu, upriliči 26. marta, prije podne, kada će biti prisutni mnogi Petrovčani i ljubitelji djela velikog slikara.

Istoga dana, u 19h, održat će se i tradicionalno godišnje druženje Petrovčana, u Beogradu, koje organizuje tamošnje Udruženje Petrovčana, tako da će ovaj dan, zaista biti za pamćenje.



## Petrovački „Bosanski ćilim“ na markama BH Pošte



Nedavno, u decembarskom izdanju poštanskih maraka BH Pošta, pod radnim naslovom „Rukotvorine iz Bosanskog Petrovca na poštanskim markama BH Pošte“, štampan je „Bosanski ćilim“, čija je proizvodnja obnovljena u novopokrenutoj „Ćilimari“.

„Izbor motiva ćilima za bh. poštansku marku ima veliki značaj na popularizaciju autentične kulturne baštine koju s puno ljubavi i umještosti, s koljena na koljeno, njeguju vješte ruke petrovačkih cura i žena. Petrovački ćilimi i drugi vezeni predmeti ukrasne i primijenjene vrijednosti, decenijama krase mnoge domove kako u Bosni i Hercegovini, tako i u susjednim zemljama i širom svijeta. Proizvodnja je bila obustavljena tokom proteklog rata, tako uspješno da proizvodi današnje „Ćilimare“ predstavljaju svojevrsni logotip na portalu našeg grada“ – kaže Doc. Mr. Milica Kecman, direktorica općinskog Centra za kulturu i obrazovanje.

Poštanski „Bosanski ćilim“ pušten je u prodaju po cijeni od 5 KM, što je najviši iznos vrijednosti neke markice BH Pošte u proteklih 5 godina! Marka će biti korištena samo za pismonosne pošiljke većih vrijednosti, čije marke predstavljaju pravi mamac za filateliste; time istovremeno raste i ugled petrovačkih ćilima.

Nakon 2011. godine, kada su BH Pošte izdale markicu u čast 100-godišnjice rođenja jednog od „petrovačkih velikana“, Skendera Kulenovića – markica sa motivom petrovačkog „Bosanskog ćilima“ predstavlja svojevrsni poziv turistima da posjete grad plavog neba, koje se oslanja na Grmeč, Klekovaču, Osječenicu, na nebu najbliže rubove petrovačkog prirodnog zelenog ćilima.

Naš zavičaj bogat je jedinstvenim, endemskim vrstama biljnog i životinjskog svijeta, i ne manje zadivljujućim kreacijama našeg čovjeka, koji će se prije ili kasnije naći kako na poštanskim markama tako i u školskim knjigama, turističkim prospektima i drugim informativno-obrazovnim medijima.



## Grad „okupiran“ bagerima

„Zimsku“ građevinsku sezonu produžilo je neočekivano lijepo vrijeme, tokom januara mjeseca, pa je desetak bagera „okupiralo“ centar grada, na izgradnji kanalizacionog sistema.

Za samo jedan mjesec, iskopano je i postavljeno više od 4 km nove kanalizacione mreže! U toku je i asfaltiranje cesta, tj. njihovo vraćanje u prvobitno stanje, koliko je to uopšte moguće, obzirom na neizvjesnost budućih padavina i temperature. U svakom slučaju, logika je bila ta da je bolje uraditi privremeno ravnjanje zatrpanih kanala, nego ih ostaviti u takvom stanju, cijelu zimu.

Izvođači su radili tako reći udarnički, kako bi se što prije oslobodio barem prilaz centru grada.

„Cesta od raskrsnice na magistralnom put M5 do Doma zdravlja je pripremljena za završetak. Već je nanesen prvi sloj asfalta, a za dan-dva biti će postavljen i završni sloj, čime ćemo pokušati ovu dionicu puta, vratiti u prvobitno stanje i neometan saobraćaj“ – rekao je Huse Jukić, šef općinskog tima za izvođenje projekata.

Već ranije ove godine, u sklopu obilježavanja Dana Općine Bosanski Petrovac, svečano je pušteno u rad više od 10 km novog dijela kanalizacione mreže, a do kraja januara 2016 godine. završava se oko 16 km kanalizacione mreže.

Ovo je, inače, najveći i najskuplji, projekt izgradnje infrastrukture, u našem gradu, nakon izgradnje vodovoda iz Sanice, dugog 31 kilometar, koji je građen prije gotovo četiri decenije.



# Povezana kanalizaciona mreža ispod magistrale

Mašine zagrebačkog preduzeća Montmontaža povezale su, 10. septembra 2015. kanalizacionu mrežu ispod glavne petrovačke raskrsnice, na kojoj se križa magistralna cesta M5 Bihać-Ključ sa cestom za Drvar. O značaju ove raskrsnice, na kojoj se susreću dvije magistralne ceste, govori činjenica da magistrala M5 čini dionicu evropskog međunarodnog puta E761, koji povezuje zapadni dio BiH (Bihać) sa istokom Srbije.

Upravo zbog takvog značaja raskrsnice, načelnik Zlatko Hujić je pohvalio uspjeh Montmontaže:

*„Mašine su probile kanalizacione mrežu ispod magistralne ceste, a da ni jednog trenutka nije bio zaustavljen promet preko ove važne raskrsnice! Ova firma dobro radi, zadovoljni smo dinamikom posla, i ako vremenske*

*prilike posluže biti će poštovani rokovi, da već krajem godine, budu završeni radovi.“*

Montmontaža je glavni izvođač projekta izgradnje kanalizacione mreže i pogona za prečišćavanje otpadnih voda, koji predstavlja najveći infrastrukturni zahvat Općine posljednjih decenija.

U toku je priprema dokumentacije i na izgradnji postrojenja za tretman otpadnih voda u koji će se investirati više od 2,5 miliona KM.

Ovaj projekt prepoznat je kao najbolji ekološki projekt u Bosni i Hercegovini, što je potvrđeno dodjelom priznanja „Zlatni javor za 2015. godinu“, u Sarajevu, u okviru saradnje entitetskih fondova za zaštitu okoliša.



## Dogradnja kanalizacionog priključka na Ploči

Fond za zaštitu okoliša Federacije Bosne i Hercegovine podržat će nastavak izgradnje kanalizacione mreže u našem gradu sa 60 hiljada KM, definirano je potpisanim ugovorom, krajem prošlog mjeseca, u Sarajevu.

*„Najveći infrastrukturni projekt u gradu je izgradnja kanalizacionog sistema sa prečištačem*

*otpadnih voda. Do sada je realiziran sa oko 17 kilometara nove mreže, a ove godine mi nastavljamo izgradnju sa već ugovorenim sredstvima, a i sa ovim novim grantom od Fonda za zaštitu okoliša“* – rekao je općinski načelnik Zlatko Hujić, nakon potpisivanja ugovora o grantu. U ovoj fazi radova novcem iz Fonda za okoliš Federacije Bosne i Hercegovine biti će izgrađeni novi dijelovi

kanalizacione mreže, odnosno jedan njen krak u ulici Ploča u dužini od 450 metara.

Svakako da se neće stati s nastavkom aktivnosti priključivanja domaćinstava koja sada nisu obuhvaćena priključcima, jer općina intenzivno i dalje pronalazi sredstva, kako bi postigli maksimum, u tom cilju.

## ELEKTRIFIKACIJA POVRATNIČKIH NASELJA

Dvadeset godina nakon rata, povratnička naselja u podnožju Grmeča, Marjanovića Do i Vučkovića Do, dobit će električnu energiju. Elektrodistribucija Bosne i Hercegovine je, ovih dana, završila izgradnju visokonaponske i niskonaponske mreže. U ovim naseljima žive mahom starije osobe.

*„Utrošili smo mnogo vremena i truda, i uspjeli smo dobiti podršku i sa najvišeg nivoa Elektroprivrede BiH u Sarajevu, da se konačno u ova dva zaseoka izgradi elektroenergetska mreža i dovedu priključci. Predugo su ovi ljudi bili u mraku. Naše opredjeljenje je bilo da ovim ljudima stvorimo uslove da normalno žive, a život bez električne energije nije održiv. Ovi ljudi su do sada živjeli pod svijećama, ali uskoro će i tamo zasijati električne sijalice. Išao sam nekoliko puta u Elektroprivredu BiH, tražeći da se izgradi elektromreža. Zato sam zadovoljan činjenicom da su radovi konačno počeli, i koristim priliku da i na ovaj način zahvalim rukovodećim ljudima Elektroprivrede BiH u Sarajevu, Bihaću i u našem gradu!“* – sa zadovoljstvom ističe

načelnik Zlatko Hujić. Prve sijalice zasijale su u Prkosima, prije dvije godine u osam domaćinstava, koja nisu bila uključena u distributivnu mrežu, ni u dugoročnim planovima.

Medjutim, danas imaju svoju vlastitu struju koju dobijaju iz sunčanih-solarnih kolektora, čije postavljanje je finansirala općina BP (50%) i UNDP (50%), u ukupnoj vrijednosti od 120.000 km!



# POMOĆ POLJOPRIVREDNICIMA

Međunarodni fond za poljoprivredni razvoj (IFAD) odobrio je našoj zemlji, u oktobru prošle godine, oko 30 miliona dolara, od čega se 13,7 miliona dolara odnosi na kreditna sredstva, 780.000 dolara na grant sredstava, dok će oko pet miliona dolara osigurati Međunarodni fond OPEC. „Projekt razvoja ruralnog poslovanja“ (RBDP provodit će se u 27 općina u Federaciji i 20 općina u RS, s osnovnim ciljem, da se omogući malim poljoprivrednicima, da sa poljoprivrede za vlastite potrebe pređu na komercijalnu poljoprivrednu proizvodnju. Očekuje se povećanje prosječnih prihoda kućanstava iz poljoprivrednih izvora za oko 30% i povećanje zaposlenosti žena i omladine za 5-10%. Za korišćenje ovih sredstava mogu se prijaviti poljoprivredni proizvođači, zainteresirani

za komercijalnu poljoprivredu, zatim udruženja proizvođača i zadruge, koje su orijentirane prema malim poljoprivrednim posjednicima, te žene i omladina bez zaposlenja zainteresirani za farmsko ili nefarmsko zapošljavanje.

Prema najavama, naša općina bi trebala dobiti oko milion KM, koliko ide i općinama Bužim i Bos. Krupa. Na sastanku održanom u Bihaću, 23. decembra 2015., direktor programa IFAD za BiH, profesor dr. Halil Omanović, je najavio da će pripreme aktivnosti početi polovinom februara, 2016-te, dok se u maju očekuje početak trogodišnje realizacije projekta. Za svaku regiju bit će određen zaseban koordinator, koji će posjetiti svaku općinu i s ciljem da se upozna sa osnovnim

potrebama općina. Naši općinski službenici već obavještavaju poljoprivrednike o projektu i pokazuje se da ima dosta interesa kod poljoprivrednih proizvođača.

Na našoj općini su, 1997-2011. provedeni neki projekti financirani iz sredstava IFAD u vrijednosti od oko 2.000.000 KM. Novac je uložan pretežno u poljoprivrednu proizvodnju i infrastrukturu.

Dragana Manojlović, stručna saradnica za planiranje razvoja poljoprivrede u Općini, kaže kako je ulaganje imalo velikog značaja, jer su poljoprivrednim proizvođačima poboljšane saobraćajnice i vodovodna mreža, unaprijeđena poljoprivredna mehanizacija, a i povećao se broj osnovnog stada.

## Upis nekretnina

Na sastanku sa Željkom Obradovićem, direktorom Federalne uprave za geodetske i imovinsko-pravne poslove, održanom 27. januara, kojem su sa petrovačke strane prisustvovali načelnik Zlatko Hujčić i Omer Hodžić, šef Službe za prostorno uređenje, katastar i imovinsko-pravne odnose, dogovoren je završetak postupka proglašenja podataka za tri katastarske općine u našem gradu, čime će građani moći uknjižiti vlasništvo u zemljišne knjige.

„Završena je procedura za katastarske općine Kolunić, Bara i Rašinovac, te će vrlo brzo građani moći izvršiti pojedinačan upis vlasništava u Općinski sud u Bihaću. U ovoj godini nastavit ćemo postupak izlaganja podataka za naredne katastarske općine. Sa g. Obradovićem dogovoreno je da se nastavi izlaganje podataka za katastarske općine Bjelaj, Medeno Polje, Brestovac i KO Petrovac, što će biti i završeno u ovoj godini. Od Federalne uprave dobit ćemo pomoć u tehničkoj opremi, u vrijednosti oko 20 hiljada KM. Konkretno, radi se o GPS uređaju za lociranje parcela, ali i našem pristupanju izrade vrlo važnog, takozvanog, Adresnog registra.“ – kaže Omer Hodžić.

Kao u većini općina, tako i u našoj, veliki broj ulica nema kućne brojeve, pogotovo u ruralnim područjima, pa se na stotine građana vode na adresi bez broja, što stvara probleme prilikom registracije građana.

„Adresni registar je projekt koji se kao pilot projekt vodi u Hercegovačko-neretvanskom kantonu, u koji će se uskoro uključiti i naša Općina.“ – optimističan je Hodžić.



## Održana Svetosavska akademija



„Dan kada naša Crkva proslavlja poklonjenje Časnim verigama Svetog apostola Petra, u gradu koji nosi ime tog apostola, Bosanskom Petrovcu, petak 29. januar 2016. godine, ostaće zlatnim slovima upisan u Ljetopisu Srpske pravoslavne crkve u Bosanskom Petrovcu, ali i u istoriji ovog divnog krajiškog gradića. Toga dana, u večernjim časovima, u Domu kulture, održana je prva poslijeratna Svetosavska akademija, pod nazivom „S ljubavlju Svetom Savi, Bogu i rodu“.

Akademiju su pripremili učenici Mješovite srednje škole „Bosanski Petrovac“ i OŠ „Ahmed Hromadžić“, uz učešće crkvenog hora OŠ „Drinić“, sa blagoslovom Njegovog preosveštenstva episkopa bihačko-petrovačkog gospodina Atanasija. Akademija je počela himnom Svetom Savi. Prisutne su pozdravile srednjoškolke Marija Bulajić i Jovana Budimir, koje su pozvale prisutne da zajedno sa njima uživaju u radosti i ljepoti Svetosavlja, sa željom da im svima, molitvenim zastupništvom Svetoga Save, Svemilostivi Gospod podari radost i mir, sreću, zdravlje i napredak u svim vrlinama.

Potom se prisutnima obratio Njegovo preosveštenstvo episkop Atanasije, koji je blagoslovio prvu akademiju. Prisutne je pozdravio i načelnik Zlatko Hujčić, koji je istakao da njega, kao kosmopolitu i čovjeka opredijeljenog za suživot, trajni mir i blagostanje, neizmjereno raduje da se za vrijeme njegovog mandata održava prva poslijeratna Svetosavska akademija. Načelnik se zahvalio episkopu Atanasiju, sveštenstvu, učenicima i njihovim vjeroučiteljima na trudu koji su uložili u pripremu akademije.

Među mnogobrojnim posjetiocima ove veličanstvene manifestacije, među petrovačkim sveštenstvom, roditeljima, učenicima, nastavnicima, profesorima, novinarima, Akademiju su uveličali g-đica Bobana Velaga, predsjednica Opštinskog vijeća; g-đa Besima Kišljen, direktorica Mješovite srednje škole „Bosanski Petrovac“; g-đa Mujesira Kavaz, direktorica OŠ „Ahmed Hromadžić“; g-đa Blažena Stoisljević, direktorica OŠ „Drinić“; g. Rajko Miljević, predsjednik Zavičajnog udruženja „Podgrmeč“ i brojni gosti.

U nastavku programa, članovi dramske sekcije koju su oformili učenici Mješovite srednje škole, zajedno sa profesorom pravoslavne vjeronauke, prikazali su muzičko-scenskim

komadom „Rastko – istorijska slika u tri čina“ kako je Rastko Nemanjić, mladi nasljednik prestola, zavolio Boga i otišao na Svetu Goru, te postao monah Sava. Tumačeći likove Svetog Save, njegove majke, braće, braće, vojvoda i svetogorskih monaha, mladi glumci Snežana Čulibrk, Jovana Budimir, Milica Mirković, Aleksandra Dragić i Danilo Kecman otkrili su na trenutak plamenu ljubav Svetog Save prema Bogu, Crkvi i svome rodu.

Akademija je nastavljena sletom svetosavskih i narodnih pjesama, koje su izveli članovi

amaterske etno-grupe srednjoškolaca. Grupa je formirana na dodatnoj nastavi pravoslavnog nauka, a njeni članovi su Biljana Mrđa, Jelena Zorić, Marija Bulajić, Danijela Pećanac, Nikolina Mrđa, Marina Tešić, Anđela Radišić, Snežana Čulibrk, Aleksandra Dragić, Milica Mirković, Milica Đaković i Milica Šarac. Ove radosne pjesme uljepšao je svojom harmonikom Srđan Kecman, učenik prvog razreda Ekonomske škole.

Posebno oduševljenje izazvalo je izvođenje predstave „Sveti Savo pomaže siromašnoj porodici“, koju su izveli članovi spomenute dramske sekcije Danijela Pećanac, Marija Bulajić, Snežana Čulibrk i Jovana Budimir. Osnovci su se još jednom predstavili pjesmom „Kosovski božuri“. Svetosavske molitve izvodili su gimnazijalka Nikolina Mrđa i osnovci Marija Čulibrk i Mihajlo Nikić. Kao posebni gosti, akademiju su uveličali članovi crkvenog hora OŠ „Drinić“, pjesmama „Kaži meni daće učeniče“ i „Gusta mi magla padnala“.

Na kraju akademije prisutne je još jednom pozdravio Episkop Atanasije, rekavši da mu je srce puno, kada vidi sa kojom mladošću, energijom, vjerom i ljubavlju učenici večeras svima nama oprisuju lik i djelo Svetog Save. „Hvala vam dragi učenici, hvala vašim dragim vjeroučiteljima, koji niste žalili truda ni vremena na napravite i ovdje izvedete ovu divnu akademiju! Svi smo danas ozareni vašom ljubavlju, koja je u stvari ljubav Svetog Save, Hristova, Bogočovječanska ljubav. Želim svima vama da i dalje napredujete u nauci svetosavskoj, u nauci Bogočovječanskoj!“

(Preneseno sa portala Eparhije Bihačko-Petrovačke, <http://www.eparhijabihackopetrovacka.org>)

# Promocija knjige poezije „Toplina“


U subotu, 30. januara, dan nakon održavanja Svetosavske akademije, u Domu kulture je priređena promocija knjige poezije „Toplina“, mlade autorice Nine Halilbašić iz Bosanske Gradiške. Ovo je njena druga zbirka pjesama, a sadrži trideset tri pjesme, prenoseći simboliku trideset tri zrna tespiha koji veličaju ime plemenitog Boga, Allaha dž.š. Izdavač je knjižarska kuća „Planjax“, iz Jelaha.

Simbolički postavljena na religijskom nivou, sa sadržajima spiritualne odrednice, poezija Nine Halilbašić šalje, još više, obične, humane, tople ljudske poruke, slavi i veliča porodične vrijednosti i ljubav prema bližnjem, u jednostavnom svakodnevnom životu. Sama autorica kaže da nije pjesnikinja, i da se ne voli tako nazivati. Ona je samo mlada žena, koja svojim mislima prelevenima na papir (ili na ekran mobitela, u koji ih zapisuje gdje god je potakne inspiracija) poziva ljude da se, kako kaže, „ugriju iznutra“ i osjete toplinu, kako svoju tako i drugih bića oko sebe.

Nina je porijeklom iz Bosanske Gradiške, ima 25 godina i završila je Islamski pedagoški fakultet u Bihaću, kao najbolja studentica generacije sa prosjekom 9,77. Prije zbirke „Toplina“ izdala je knjigu poezije „Između istine i grijeha.“ Zajednička odrednica svih njenih pjesama jesu ljubav prema Svevišnjem, prema čovjeku, prema domu i prema porodici, a fascinira način na koji u svome pisanju i prezentaciji autorica uspijeva izbjeći patetiku i nepogrešivo pogoditi pravu emociju kod čitalaca, što su mogli osjetiti svi koji su se sa Ninom te večeri smijali i plakali u punoj sali Doma kulture.

Promotori su bili Ninini prijatelji, profesori Hadis Kurtović i Amela Abdić, a moderatorica, koja nas je na divan način vodila kroz ovu priredbu, bila je naša sugrađanka Vanesa Hodžić-Hromadžić. Stihove iz zbirke „Toplina“ su recitovali Safet Hamzić, te Nedžma i Ismira Jaganjac, a svojim izvedbama ilahija su veće uljepšale Arijana Salkić i Medina Ganibegović. Promociju su upriličile i na sjajan način

organizirale aktivistice odjela za porodicu i ženski aktivizam pri Medžlisu Islamske zajednice Bosanski Petrovac i Asocijacija žena „Fatma“, a osim velikog broja građana prisustvovao je općinski načelnik Zlatko Hujčić.



## Izbor sportista godine...

# Petrovački sportist 2015: šesnaestogodišnji Mirnes Hukić!

Fudbaler petrovačke „Mladosti“, 16-godišnji **Mirnes Hukić**, učenik srednje mješovite škole, izabran je za najboljeg sportistu Općine Bosanski Petrovac u 2015. godini, na manifestaciji održanoj 24. januara 2016!

Hukić je dobio ovo laskavo priznanje zahvaljujući svom izuzetnom talentu, koji je posebno iskazao kroz takmičarske rezultate ostvarene u protekloj godini. Već lider FK „Mladost“, najviše je doprinio osvajanju drugog mjesta u kadetskom takmičenju Unsko-sanskog kantona.

Ovom prilikom proglašeni su i drugi najbolji laureati u sportskim disciplinama:

**Armin Mahmutspahić**, trener Odbojkaškog kluba „Mladost“, koji je i selektor odbojkaške reprezentacije USK, proglašen je za najboljeg trenera u našoj Općini.

Za najbolji ženski sportski tim proglašen je **Ženski košarkaški klub „Mladost“**, koji je vice-šampion Kantona.

Najbolji tim u muškoj konkurenciji timova je **Pionirska ekipa Odbojkaškog kluba „Mladost“**, prvak Unsko-sanskog kantona i osvajač trećeg mjesta na prvenstvu Federacije BiH u svojoj kategoriji.

Prilikom izbora za najboljeg sportistu, žiri je poticao i motivaciju usmjerio na mlade, pred kojima je budućnost bosanskopetrovačkog sporta: „*Jest da ne spadamo među veće općine, jest da nemamo puno sportista, ali ovo što imamo to je hvale vrijedno!*“ – s ponosom ističe Armin Mahmutspahić, predsjednik Sportskog saveza Općine.

S njim se saglasio načelnik Zlatko Hujčić, pokrovitelj prvog izbora sportiste godine Općine, koji je naglasio da bi rezultati bili bolji, kada bi petrovački sportisti imali

povoljnije uvjete za treninge u zatvorenom prostoru. „*Nerazumno je i nedopustivo, da naši sportski klubovi moraju plaćati 500 KM za korišćenje sala, a da te pare idu u Bihać! To su naše sale, koje su Petrovčani gradili! Niko me ne može ubijediti, da Petrovac mora Bihaću plaćati korišćenje petrovačkih sala!*“

Proglašene su i „**Mlade nade Bosanskog Petrovca**“:

**Jovana Banjac i Nataša Počuč** (karate), **Adi Linić, Aldin Tica i Nemanja Trnjaković** (odbojka), **Kenan Družić, Ramo Jaganjac i Zdravko Kecman** (nogomet), **Nedžma Jaganjac i Belmin Selimović** (šah) te košarkašice **Erna Velagić i Alma Redžić**.

Najbolji pioniri: **Bojana Počuč i Milan Kecman** (karate) i **Eldin Mahmutspahić** (odbojka).

Najbolji kadeti: **Lejla Jačić i Armin Terzić** (odbojka) i **Nemanja Davidović** (karate).

Najbolji juniori: **Azra Ferizović** (košarka) i **Boris Stojanović** (odbojka)

Najbolji seniori: **Alen Bašić** (nogomet) i **Edisa Nukić** (košarka).

Najbolji u kategoriji školski sport: osnovnoškolci **Faris Hujčić i Ajla Mustafi**.

Srednjoškolski: **Milica Latinović i Emir Ogrić**.

Zahvalnice za podršku sportu: **Općinski načelnik Zlatko Hujčić, Sportski savez Unsko-sanskog kantona, JU Dom zdravlja, Osnovna škola „Ahmet Hromadžić“ i Mješovita srednja škola.**



Zahvalnice sportskim radnicima: **Ibrahim Zajkić** (Košarkaški klub), **Mirza Mehedin** (Udruženje pedagoga), **Refik Kafedžić** (Karate klub), **Svetko Dukić i Tahir Jaganjac** (Nogometni klub), **Ismet Alić i Nermin Mahmutspahić** (Odbojkaški klub), **Merđad Jaganjac** (Šahovski klub) i **Tomica Grbić** (Hrvački/rvački klub).

Specijalne nagrade pojedincima i kolektivima: **Edhem Jaganjac**, predsjednik Skupštine NK „Mladost“ i član Izvršnog odbora NS USK, **Rusmir Mujadžić**, sekretar Odbojkaškog kluba „Mladost“ i **Milkan Mrđa**, trener Karate kluba „Mladost“; te kolektivi **Klub ekstremnih sportova „Crni vrh“**, **Šahovski klub „Mladost“**, **„Hrvački/rvački klub „Grmeč“** i **Biciklistički klub „Grip“**.

Posebna zahvalnica: **Firma Kavaz doo**, za pomoć u prijevozu sportista.

# SPORTIST USK 2015: BOKSAČ ELVEDIN DULIĆ!

Nakon što je 24. januara, 16-godišnji fudbaler petrovačke „Mladosti“ Mirnes Hukić proglašen za sportistu Općine Bosanski Petrovac u 2015. godini, bihački boksač Elvedin Dulić je dan kasnije, na manifestaciji održanoj u istoj dvorani, proglašen za najboljeg sportistu Unsko-Sanskog kantona u 2015. godini! Elvedin Dulić je član Kick boxing centra „Bihać“, osvajač 2 mjesta

u kategoriji „seniori kick light“ do 74 kg na WAKO Svjetskom kupu održanom u austrijskom gradu Innsbuku. Prije početka dodjele nagrada, prisutnima su se obratili predsjednik Sportskog saveza Unsko-sanskog kantona Emir Dautović, potom domaćin svečanosti načelnik Zlatko Hujčić, te premijer Unsko-sanskog kantona mr. Izudin Saračević. U kulturno-zabavnom dijelu

svečanosti nastupili su hor OŠ „Ahmet Hromadžić“, petrovačka folklorna grupa predvođena Editom Bolić, te Sara Midžić, članica Sportsko-plesnog centra „VIRUS“ Bihać. Naša mlada sugrađanka Medina Ganibegović izvela je pjesmu „Rijeka bez imena“. Ovo je bio prvi put da je naš grad bio domaćin jedne ovako značajne manifestacije.

„Avaz“ u gradu velikana kulture Mersada Berbera, Jovana Bijelića, Ahmeta Hromadžića i Skendera Kulenovića (www.avaz.ba; 14. februar 2016.)

## Nemaju sud, notara, advokata, zakidaju ih za šumu, ali domaćini svoju varoš vide kao idilično mjesto za život

Bosanski Petrovac, krajiški gradić ušuškan „starinom“ Grmečom, Klekovačom, Oštreljom i Osječenicom, u rimsko doba raskrsnica puteva koju spominje Konstantin Porfirogenet 950. godine pod nazivom Pset, u osmanlijski vakat kadiluk i kapetanija, u Drugom svjetskom Titova baza i mjesto održavanja prvog „a-fe-že“ (Prve zemaljske konferencije Antifašističkog fronta žena), a u posljednjem ratu mjesto stradanja civila, danas je varošica sa tek jedva 8.000 duša, iako je zvanični popis od prije 24 godine „brojao“ njih 15.621, u 35 naselja.

No, „višak“ historije na ovim prostorima u kojima su dominirali ratovi, rasuli su Petrovčane kao pljevu na vjetru. Oni koji su ostali – a preliminarni rezultati popisa iz 2013. kažu da ih ima 7.946, nose i dalje u sebi prepoznatljivo gostoprimstvo i osvježavajuću ljubaznost.

### Ne gubi nadu

Ovdje ljudi cijene gosta, pa tako najpoznatiji petrovački ugostitelj Tahir Jaganjac uvijek pita „štaš pojesti, štaš popiti“. Jaganjac, prije rata robusni nogometaš Rijeke i drugih klubova, nakon rata multifunkcionalni ugostitelj i turistički radnik, osim „tranzitnog“ motela Nr.9, privatizirao je i hotel „Stari grad“, dok hotel „Silver“ sa 32 prvoklasne sobe pretvara u starački dom. Neostvarena želja mu je skijaški centar na Oštrelju, petrovačkoj zračnoj banji, gdje je, već 74 godine, parkiran Titov voz „Proleterka“, inače zaštićeni spomenik kulture, na komadu pružnih šina, ostatku kolosijeka od Ličke Kaldre do Smetice.

– Prijatelju, Oštrej na 1.040 metara nadmorske visine bio je pripremljena rezervna varijanta za stazu u vrijeme Zimske olimpijade u Sarajevu 1984. godine. Izgradio sam objekt, postavio ski-liftove, staze su tu, ali nisam do danas imao podršku da se na Oštrej, gdje ima nekih 70 privatnih vikendica, dovede struja. Svih ovih godina radio sam na agregate, ali „skuplja pita od tepsije“. Ovakva lijepa brdovita Krajina „ubila se“ za zimski sport, a da nema svoj skijaški centar – žalostan je Jaganjac, ali još ne gubi nadu.

Pred zgradom Općine dočekuju nas biste tri Titova heroja – Radivoja Rodića, Mahmuta Ibrahimpašića i Zdravka Čelara. Dio općinske zgrade odnedavno je iznajmljen BBI banci, jer je ovaj gradić skoro bio ostao bez ijedne banke

nakon uvođenja stečaja u „Banku Srpske“, koja je ovdje imala svoju filijalu. Bosanski Petrovac nema ni notara, ni advokata, jer je reformom sudskog sistema u BiH ukinut ovdajšnji općinski sud.

– Zakon o notarima odredio je cenzus od 20 hiljada stanovnika za ustanovljavanje notara, a ovdje živi oko 7.500 stanovnika – kaže nam općinski načelnik Zlatko Hujčić.

### Traže 10 posto

Pritiču ga i drugi problemi, ali mu je ovih dana malo laknulo kada je Ustavni sud FBiH presudio u korist Općine Bosanski Petrovac koja zbog nepoštivanja Zakona o lokalnoj samoupravi od Unsko-sanskog kantona (USK) svake godine gubi milionske sume. Naime, s područja ove općine Šumsko-privredno društvo (ŠPD) „Unsko-sanske šume“ siječe najviše drvene mase, gotovo 50 posto od ukupne mase, a zauzvrat Općina dobiva tek jedan posto naknade od ovog državnog preduzeća.

– Od 35 miliona KM godišnje, koliko iznose fakture za šumu, 15 miliona je s područja naše općine, a mi od toga dobijemo 350.000 KM. Smiješno!? Tražimo 10 posto – kaže Hujčić očekujući da Skupština USK provede odluku Ustavnog suda FBiH.

Kako je ova 2016. godina izborna, petrovački načelnik, koji inače ne pripada nijednoj stranci, kaže da se neće posebno pripremati za novi mandat, već će, samouvjereno kaže, narodu pokazati statistiku šta je uradio.

Nabraja da je to 18 kilometara kanalizacije vrijednosti 3,7 miliona KM, dolazak „Binga“, koji je kupio objekt „Noviteta“ i skoro zapošljavanje 50 ljudi, zatim bosansko-norveškog stočara Arifagića sa stotinama grla krava, pilane, pa slovenskog „Pirnara“ sa 70 radnika... Hujčić ističe i kako nije zaboravio ni spomenik u bronzi petrovačkim velikanima kulture, književnicima Skenderu Kulenoviću i Ahmetu Hromadžiću, te slikarima Mersadu Berberu i Jovanu Bijeliću pa je u budžetu za ovu godinu pripremio 60.000 KM.

– To će na javni tender, a da se ja pitam, dao bih da spomenik radi kipar Zlatko Dizdarević iz Velike Kladaše, onaj što je uradio monumentalni kip junaka Muje Hrnjice na konju – kaže otvoreno.

Kladaški umjetnik već je Petrovčanima predstavio skicu ideje spomenika od polirane bronzne velikoj četvorki čija djela su

zadivila svijet. Nije zaboravio u njega utkati i runolist, simbol ovog gradića. Kompleks bi bio visine oko dva metra, širine oko 4,5 metara, s postamentom od 6,5 metara.

Petrovčani su zaista ponosni na Skendera, Ahmeta, Mersada i Jovana, a imaju i na koga biti. Ni manjeg mjesta ni više umjetnika svjetskog kalibra! Dok šetamo po simpatičnom gradiću ljudi malo u šali, malo u zbilji pokazuju na narandžastu fasadu u centru s komentarom: „I ovo je Zlatko (Hujčić, op. a.) sradio“. Saznajemo da se radi o načelnikovom lokalu, kao i da je ovaj dio bio zapušten sve dok se Hujčić nije „uhvatio mandata“. Na trgu smijeh „lokalaca“ i neuobičajena vedrina ljudi. Najstariji među njima Ibrahim Hadžić zbija šegu sa svima, a svoju grupu „čaršanlija“ naziva starijim maloljetnicima.

### Ogromni potencijali

Ljudi, pare su problem jedino kad ih nema – objašnjava lukavo svoju filozofiju finansija, a „Avazovog“ reportera upozorava da petrovački policajci brzo škljocaju fotoaparatom kod nepropisno parkiranih vozila.

Pored njih s kantama za smeće prolazi Jasminko Delimehić, komunalni redar. Rođen u Prnjavoru, nikada nije ni slutio da će penziju dočekati u krajiškom gradiću za koji prije rata teško da je i čuo.

– Od sudbine se ne bježi. U Prnjavoru sam preživio rat na radnoj obavezi, a onda zamijenio kuću i tu sam sa ženom, djece nemamo. Prnjavor je za mene završena priča – kaže Delimehić.

Zanimljiva su, svakako i zapažanja općinskog vijećnika i ratnog vojnog invalida Admira Spahića (SBB), koji se, i pored visokog procenta invalidnosti, uspješno bavi pčelarstvom, voćarstvom i plasteničkom proizvodnjom. Voli svoj grad i smatra da je glavni problem iseljavanje. Navodi kako su ovdje u prošloj godini umrle 123 osobe, a rodile se svege 32 bebe uz zanemariv broj sklopljenih brakova.

– Ipak, nekih pomaka ima, pa su, osim domaćih farmera, počeli dolaziti poljoprivrednici iz drugih općina, Cazina i Bihaća, u mjesto Skakavac, a Jusuf Arifagić u Prkose i Oraško brdo. Bosanski Petrovac ima ogromne potencijale za poljoprivredni razvoj – ističe Spahić, koji svoj grad vidi u budućnosti kao idilično mjesto za život.